

গণপ্রজাতন্ত্রী বাংলাদেশে সরকার
তথ্য অধিদফতরি
বাংলাদেশে সচিবালয়
ঢাকা।

সংবাদ গতিধারা

ঢাকা, বৃহস্পতিবার ১২ নভেম্বর ২০১৫, ২৮ কার্তিক ১৪২২

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। কক্সবাজারে প্রতিরক্ষা রাডারের উদ্বোধন করলেন রাষ্ট্রপতি
- ২। মানুষের পাশে থাকুন বন্ধুর মতো : ফায়ার সার্ভিসকে প্রধানমন্ত্রী
- ৩। সন্ত্রাস ও জঙ্গিবাদ সহ্য করা হবে না : সংসদে প্রধানমন্ত্রী
- ভাইবার ও হোয়াটস অ্যাপ সাময়িক বন্ধ করা হবে
- ৪। অনুপ চেটিয়াকে ভারতে হস্তান্তর
- ৫। প্রধানমন্ত্রীকে ফোনে ধন্যবাদ জানালেন ভারতের প্রধানমন্ত্রী নরেন্দ্র মোদি
- ৬। যে কোনো মূল্যে রাজস্ব আয়ের লক্ষ্যমাত্রা অর্জন করতে হবে : অর্থমন্ত্রী
- ৭। আমেরিকান সুপার হাসপাতালের জায়গা ফিরে পেল সরকার
- শিগগির চালু হবে : স্বাস্থ্যমন্ত্রী
- ৮। বঙ্গবন্ধু স্যাটেলাইট উৎক্ষেপণ ২০১৭ সালে : ফ্রান্সের সঙ্গে ত্রয়চুক্তি স্বাক্ষরিত
- ৯। বেসরকারি শিক্ষা প্রতিষ্ঠানে শিক্ষক-কর্মচারী নিয়োগ বন্ধের নির্দেশ
- ১০। সরকারি চাকরি পদোন্নতি সেবা লাইসেন্স সব এক ঠিকানায়
- ১১। সংসদে সিটি কর্পোরেশনসহ চারটি বিল উত্থাপন
- ১২। ওডিআইতে তৃতীয়বারের মতো বাংলাওয়াশ জিম্বাবুয়ে

১। কক্সবাজারে প্রতিরক্ষা রাড়ার উদ্বোধন করলেন রাষ্ট্রপতি

দেশের আকাশসীমার পাশাপাশি বিশাল সমুদ্র জলসীমা নজরদারির আওতায় আনতে বাংলাদেশ বিমানবাহিনীর কক্সবাজার রাড়ার ইউনিটে বিমান প্রতিরক্ষা রাড়ার (ওয়াই এলসি-৬) সংযোজন করা হয়েছে। রাষ্ট্রপতি মো. আবদুল হামিদ গতকাল ১১ নভেম্বর বুধবার কক্সবাজার রাড়ার ইউনিটে অনুষ্ঠিত এক অনুষ্ঠানে এ আধুনিক রাড়ার উদ্বোধন করেন। এ উপলক্ষে আয়োজিত এক অনুষ্ঠানে রাষ্ট্রপতি মো. আবদুল হামিদ বলেন, বিএএফ জাতীয় নিরাপত্তার এবং রাড়ার সংযোজনের মাধ্যমে জাতির অগ্রগতির জন্য আরো অবদান রাখতে সক্ষম হবে। সূত্র-ভোরের কাগজ (শেষ পৃ.,ক.৫), সংবাদ (শেষ পৃ.,ক.১), ডেইলি স্টার (পৃ.৩,ক.১), নিউজ টুডে (পৃ.৩,ক.৬)।

২। মানুষের পাশে থাকুন বন্ধুর মতো : ফায়ার সার্ভিসকে প্রধানমন্ত্রী

ফায়ার সার্ভিস ও সিভিল ডিফেন্সের প্রশংসা করে প্রধানমন্ত্রী শেখ হাসিনা বলেছেন, নিষ্ঠা, আন্তরিকতা ও সাহসের সঙ্গে কাজ করছে বলেই এ বাহিনী জনগণের আস্থা অর্জন করেছে। আস্থার জবাবে এ বাহিনীর সদস্যরা যে কোনো দুর্ঘটনায় জনগণের পাশে থেকে ‘বন্ধুর মতো সেবা দেবে’ বলে আশা প্রকাশ করেছেন তিনি। গতকাল ১১ নভেম্বর বুধবার ফায়ার সার্ভিস ও সিভিল ডিফেন্স সপ্তাহের উদ্বোধন অনুষ্ঠানে বাহিনীর সদস্যদের উদ্দেশে প্রধানমন্ত্রী এই আশা প্রকাশ করেন। সূত্র-যায়যায়দিন (শেষ পৃ.,ক.২), প্রথম আলো (পৃ.২,ক.২), জনকণ্ঠ (শেষ পৃ.,ক.৬), নিউজ টুডে (শেষ পৃ.,ক.২), ডেইলি সান (পৃ.২,ক.২)।

৩। সন্ত্রাস ও জঙ্গিবাদ সহ্য করা হবে না : সংসদে প্রধানমন্ত্রী

- ভাইবার ও হোয়াটস অ্যাপ সাময়িক বন্ধ করা হবে

প্রধানমন্ত্রী শেখ হাসিনা সন্ত্রাস ও জঙ্গিবাদের বিরুদ্ধে কঠোর হুঁশিয়ারি উচ্চারণ করে বলেছেন, বাংলাদেশে সন্ত্রাস ও জঙ্গিবাদ সহ্য করা হবে না। দেশের মানুষের শান্তি, নিরাপত্তা ও জানমাল রক্ষার জন্য যখন যা করা দরকার তাই করা হবে। গতকাল ১১ নভেম্বর বুধবার দশম জাতীয় সংসদের অষ্টম অধিবেশনে প্রধানমন্ত্রীর প্রশ্নোত্তর পর্বে প্রধানমন্ত্রী শেখ হাসিনা এসব কথা বলেন। স্পিকার ড. শিরীন শারমিন চৌধুরীর সভাপতিত্বে অনুষ্ঠিত এ অধিবেশনে প্রধানমন্ত্রী সংসদ সদস্যদের বিভিন্ন প্রশ্নের জবাব দেন। ভাইবার ও হোয়াটস অ্যাপের মাধ্যমে দেশে সন্ত্রাস-জঙ্গিবাদসহ সাইবার ক্রাইম বৃদ্ধি সংক্রান্ত এক সম্পূর্ণক প্রশ্নের জবাবে প্রধানমন্ত্রী আরও বলেন, সব ভালো কাজের কিছু খারাপ দিকও রয়েছে। মানুষের জীবনযাত্রা আরো সহজ হয়েছে, কর্মসংস্থান বাড়ছে। কিন্তু এই সুযোগ ব্যবহার করে কিছু মানুষ সন্ত্রাস-জঙ্গিবাদ ও সাইবার ক্রাইম করছে। তাই সন্ত্রাসী ও জঙ্গিদের ধরার জন্য কিছুদিনের জন্য হলেও ভাইবার ও হোয়াটস অ্যাপ বন্ধ রাখতে হবে। এগুলো বন্ধ রেখেই অপরাধীদের খুঁজে বের করা হবে। সূত্র-ইত্তেফাক (পৃ.১,ক.২), প্রথম আলো (শেষ পৃ.,ক.২), জনকণ্ঠ (পৃ.১,ক.৪), ইন্ডিপেনডেন্ট (পৃ.১,ক.৭), ডেইলি সান (শেষ পৃ.,ক.২)।

৪। অনুপ চেটিয়াকে ভারতে হস্তান্তর

বাংলাদেশের কারাগারে থাকা ভারতের উত্তর-পূর্বাঞ্চলের বিচ্ছিন্নতাবাদী সংগঠন উলফার (ইউনাইটেড লিবারেশন ফ্রন্ট অব আসাম) শীর্ষ নেতা অনুপ চেটিয়া ও তার দুই সহযোগীকে গতকাল ১১ নভেম্বর বুধবার ভারতের কাছে অত্যন্ত গোপনীয়তার সঙ্গে হস্তান্তর করা হয়েছে। অপর দুজন হলেন উলফা নেতা লক্ষ্মী প্রসাদ গোস্বামী ও বাবুল গোস্বামী। ১৮ বছর কারাবাসের পর তাদেরকে হস্তান্তর করা হলো। সূত্র-ইত্তেফাক (পৃ.১,ক.৫), যুগান্তর (পৃ.১,ক.১)। প্রথম আলো, যায়যায়দিন, জনকণ্ঠ, ইনকিলাব, ডেইলি স্টার, ডেইলি সানসহ অধিকাংশ দৈনিক এ বিষয়ে লিড নিউজ ছেপেছে।

৫। প্রধানমন্ত্রীকে ফোনে ধন্যবাদ জানালেন ভারতের প্রধানমন্ত্রী নরেন্দ্র মোদি

সন্ত্রাসবিরোধী লড়াইয়ে সহায়তার জন্য প্রধানমন্ত্রী শেখ হাসিনাকে ধন্যবাদ জানিয়েছেন ভারতের প্রধানমন্ত্রী নরেন্দ্র মোদি। গতকাল ১১ নভেম্বর বুধবার ভারতের প্রধানমন্ত্রীর কার্যালয়ের (পিএমও ইন্ডিয়া) টুইটার পেজে দেওয়া এক বার্তায় নরেন্দ্র মোদি এ তথ্য জানান। ওই বার্তায় আরো বলা হয়েছে, ভারতের প্রধানমন্ত্রী নরেন্দ্র মোদি টেলিফোনে প্রধানমন্ত্রী শেখ হাসিনাকে দীপাবলিরও (শ্যামা পূজা) শুভেচ্ছা জানিয়েছেন। তবে ভারতের প্রভাবশালী দৈনিক টাইমস অব ইন্ডিয়াসহ বেশ কয়েকটি গণমাধ্যমের খবরে বলা হয়েছে, বিচ্ছিন্নতাবাদী সংগঠন ইউনাইটেড লিবারেশন ফ্রন্ট অব আসামের (উলফা) সাংগঠনিক সম্পাদক অনুপ চেটিয়াকে ভারতের কাছে হস্তান্তর করায় প্রধানমন্ত্রী শেখ হাসিনাকে ধন্যবাদ জানিয়েছেন নরেন্দ্র মোদি। সূত্র-সংবাদ (পৃ.১,ক.৭)।

৬। যে কোনো মূল্যে রাজস্ব আয়ের লক্ষ্যমাত্রা অর্জন করতে হবে : অর্থমন্ত্রী

জাতীয় কো-অর্ডিনেশন কাউন্সিলের বৈঠকে রাজস্ব আদায় বাড়াতে সর্বোচ্চ গুরুত্ব আরোপ করা হয়েছে। গতকাল ১১ নভেম্বর বুধবার সচিবালয়ে অর্থ মন্ত্রণালয়ের সম্মেলন কক্ষে অনুষ্ঠিত বৈঠকে অর্থমন্ত্রী আবুল মাল আবদুল মুহিত বলেছেন, এ অর্থবছরের প্রথম প্রান্তিকে অভ্যন্তরীণ সম্পদ আহরণ গত বছরের একই সময়ের তুলনায় অনেক পিছিয়ে আছে। নতুন পে-স্কেল বাস্তবায়নসহ সরকারের সামনে অনেক চ্যালেঞ্জ রয়েছে, এসব চ্যালেঞ্জ মোকাবিলা করতে হলে যেভাবেই হোক চলতি অর্থবছরের রাজস্ব আয়ের নির্ধারিত লক্ষ্যমাত্রা অর্জন করতে হবে। এ বিষয়ে প্রয়োজনীয় পদক্ষেপ নিতে এনবিআরকে নির্দেশ দেন অর্থমন্ত্রী। সূত্র-সমকাল (পৃ.১৯,ক.৮), প্রথম আলো (পৃ.১২,ক.১)।

৭। আমেরিকান সুপার হাসপাতালের জায়গা ফিরে পেল সরকার

- শিগগির চালু হবে : স্বাস্থ্যমন্ত্রী

দীর্ঘ আইনি লড়াইয়ের পর রাজধানীর উত্তরায় অবস্থিত একটি হাসপাতালের জায়গা ফিরে পেল সরকার। ব্যক্তি মালিকানায লিজ নিয়ে তিন একর জমির ওপর প্রতিষ্ঠিত আমেরিকান সুপার স্পেশালিটি হাসপিটাল নামে এ হাসপাতালটি একটি বিদেশি কোম্পানি পরিচালনা করে আসছিল। চুক্তির শর্ত ভঙ্গ করায় সম্প্রতি উচ্চ আদালত তাদের লিজ বাতিল করেন। স্বাস্থ্য অধিদপ্তর সংশ্লিষ্ট কর্তৃপক্ষের কাছ থেকে হাসপাতালটির জায়গা, ভবনসহ সরঞ্জামাদি বুঝে নিয়েছে। গতকাল ১১ নভেম্বর বুধবার স্বাস্থ্যমন্ত্রী মোহাম্মদ নাসিম ওই হাসপাতাল পরিদর্শন করেন। পরে স্বাস্থ্যমন্ত্রী সরকারি উদ্যোগে হাসপাতাল চালুর ঘোষণা দিয়ে বলেন, যতদ্রুত সম্ভব এ হাসপাতালে বহির্বিভাগ চালু করা হবে। সূত্র-সমকাল (পৃ.২,ক.১), ইত্তেফাক (শেষ পৃ.,ক.৫), জনকণ্ঠ (পৃ.৩,ক.৩)।

৮। বঙ্গবন্ধু স্যাটেলাইট উৎক্ষেপণ ২০১৭ সালে : ফ্রান্সের সঙ্গে ত্রয়চুক্তি স্বাক্ষরিত

স্যাটেলাইট প্রযুক্তির মাধ্যমে দেশে নিরবচ্ছিন্ন টেলিযোগাযোগ সেবা চালুর লক্ষ্যে বাংলাদেশের প্রথম কৃত্রিম উপগ্রহ 'বঙ্গবন্ধু স্যাটেলাইট' উৎক্ষেপণ করা হচ্ছে। স্যাটেলাইট থেকে পাওয়া যাবে উচ্চগতির ইন্টারনেট ব্যান্ডউইথ। এর মাধ্যমে দেশের দুর্গম দ্বীপ, নদী, হাওড় ও পাহাড়ি অঞ্চলসহ সমগ্র বাংলাদেশেই টেলিযোগাযোগ স্থাপিত হবে। এছাড়া স্যাটেলাইটটিতে থাকবে ৪০ ট্রান্সপন্ডার সক্ষমতা। ফলে প্রাকৃতিক দুর্যোগের কারণে স্বাভাবিক টেলিযোগাযোগ বিচ্ছিন্ন হলেও উদ্ধারকর্মীরা স্যাটেলাইট ফোনে যোগাযোগ রেখে দুর্গত এলাকায় কাজ করতে সক্ষম হবেন। বাংলাদেশ হবে স্যাটেলাইট উৎক্ষেপণকারী ৫৪তম দেশ। তাই এই কৃত্রিম উপগ্রহটি উৎক্ষেপণের লক্ষ্যে ২ হাজার কোটি টাকার 'স্যাটেলাইট সিস্টেম' কিনতে চুক্তি করেছে টেলিযোগাযোগ নিয়ন্ত্রক সংস্থা বিটিআরসি। গতকাল ১১ নভেম্বর বুধবার রাজধানীর হোটেল সোনারগাঁওয়ে ফ্রান্সের প্রতিষ্ঠান থ্যালেস এলিনিয়া স্পেস এর সঙ্গে এ চুক্তি স্বাক্ষরিত হয়। সূত্র-সংবাদ (পৃ.১,ক.৪), সমকাল (শেষ পৃ.,ক.১), প্রথম আলো (শেষ পৃ.,ক.১), ডেইলি স্টার (শেষ পৃ.,ক.১), ডেইলি সান (পৃ.১,ক.৪)।

৯। বেসরকারি শিক্ষা প্রতিষ্ঠানে শিক্ষক-কর্মচারী নিয়োগ বন্ধের নির্দেশ

পরবর্তী নির্দেশ না দেওয়া পর্যন্ত দেশের এমপিওভুক্ত সব বেসরকারি শিক্ষা প্রতিষ্ঠানে শূন্য পদে শিক্ষক-কর্মচারী নিয়োগ বন্ধের নির্দেশ দিয়েছে শিক্ষা মন্ত্রণালয়। গতকাল ১১ নভেম্বর বুধবার শিক্ষা মন্ত্রণালয়ের অতিরিক্ত সচিব চৌধুরী মুফাদ আহমদ স্বাক্ষরিত জারিকৃত এক নির্দেশনায় এ তথ্য জানানো হয়। শিক্ষা মন্ত্রণালয়ের উপসচিব সুবোধ চন্দ্র ঢালী জানান, স্কুল-কলেজ-মাদ্রাসা এবং কারিগরি শিক্ষা প্রতিষ্ঠানের ক্ষেত্রে ওই নির্দেশনা প্রযোজ্য হবে। নির্দেশনায় বলা হয়েছে, ২১ অক্টোবর সরকার 'বেসরকারি শিক্ষক নিবন্ধন পরীক্ষা গ্রহণ ও প্রত্যয়ন বিধিমালা ২০০৬' সংশোধন করেছে। এ পরিপ্রেক্ষিতে বেসরকারি শিক্ষা প্রতিষ্ঠানে নিয়োগ কার্যক্রমে কিছু পদ্ধতিগত পরিবর্তন প্রয়োজন হবে। পরিবর্তিত পদ্ধতির বিষয়ে শিক্ষা মন্ত্রণালয় থেকে শিগগিরই একটি পরিপত্র জারি করা হবে। সূত্র-ভোরের কাগজ (পৃ.১,ক.৭), ইত্তেফাক (শেষ পৃ.,ক.২), সংবাদ (পৃ.১,ক.১), ইন্ডিপেনডেন্ট (শেষ পৃ.,ক.৭)।

১০। সরকারি চাকরি পদোন্নতি সেবা লাইসেন্স সব এক ঠিকানায়

সব ধরনের সরকারি চাকরি, পদোন্নতি, সেবা ও লাইসেন্সের আবেদন এখন এক ঠিকানায় পাওয়া যাচ্ছে। মন্ত্রিপরিষদ বিভাগের তত্ত্বাবধানে সম্প্রতি চালু হওয়া bangladesh.gov.bd ওয়েবসাইটে বিভিন্ন মন্ত্রণালয় ও বিভাগের এক হাজার ৪০৫টি ফরম একসঙ্গে পাওয়া যাচ্ছে। এই ওয়েবসাইট নিয়মিত হালনাগাদও হচ্ছে। এছাড়া মাঠ প্রশাসনে কর্মরত সকল ক্যাডার ও নন-ক্যাডার কর্মকর্তার মোবাইল ফোন নম্বর ওই ওয়েবসাইটে দেওয়ার সিদ্ধান্ত নেওয়া হয়েছে, যাতে জনগণ সার্বক্ষণিক প্রজাতন্ত্রের কর্মচারীদের সঙ্গে সহজেই যোগাযোগ করে

প্রয়োজনীয় সেবা পেতে পারেন। স্কুলে ভর্তির ফরম থেকে শুরু করে আগ্নেয়াস্ত্রের লাইসেন্স, কর্মস্থলে চিকিৎসকদের উপস্থিতি পরিবীক্ষণ চক, জটিল ও ব্যয়বহুল রোগের চিকিৎসার সাহায্যের আবেদনসহ সব ধরনের আবেদনই ওই ওয়েবসাইট থেকে পাওয়া যাচ্ছে। ‘ডিজিটাল বাংলাদেশ’ প্রতিষ্ঠায় প্রধানমন্ত্রীর কার্যালয়ের ‘এক্সেস টু ইনফরমেশন’ প্রকল্পের সহায়তায় দেশের সকল পর্যায়ের নাগরিকদের সেবা প্রদান কার্যক্রম সহজলভ্য করতেই বিশেষ এই ওয়েবসাইট চালু করা হয়েছে বলে জানান মন্ত্রিপরিষদ সচিব (সমন্বয় ও সংস্কার) নজরুল ইসলাম। সূত্র-সংবাদ (শেষ পৃ.,ক.২)।

১১। সংসদে সিটি কর্পোরেশনসহ চারটি বিল উত্থাপন

স্থানীয় সরকার পরিষদসমূহের নির্বাচনে সরাসরি রাজনৈতিক দলের প্রার্থী মনোনয়নের বিধানের প্রস্তাব করে সংসদে চারটি পৃথক বিল উত্থাপন করা হয়েছে। গতকাল ১১ নভেম্বর বুধবার দশম সংসদের অষ্টম অধিবেশনের ৪র্থ কার্যদিবসে স্থানীয় সরকার, পল্লী উন্নয়ন ও সমবায়মন্ত্রী ইঞ্জিনিয়ার খন্দকার মোশাররফ হোসেন এই বিলগুলো উত্থাপন করেন। উত্থাপিত চারটি বিল হচ্ছে স্থানীয় সরকার (সিটি কর্পোরেশন) (সংশোধন) বিল ২০১৫, স্থানীয় সরকার (জেলা পরিষদ) (সংশোধন) বিল ২০১৫, স্থানীয় সরকার (উপজেলা পরিষদ) (সংশোধন) বিল ২০১৫ ও স্থানীয় সরকার (ইউনিয়ন পরিষদ) (সংশোধন) বিল ২০১৫। পরীক্ষা-নিরীক্ষা করে ৫ কার্যদিবসের মধ্যে সংসদে রিপোর্ট প্রদানের জন্য বিল ৪টি স্থানীয় সরকার, পল্লী উন্নয়ন ও সমবায় মন্ত্রণালয় সম্পর্কিত সংসদীয় স্থায়ী কমিটিতে পাঠানো হয়। সূত্র-সংবাদ (পৃ.১, ক.৮), প্রথম আলো (শেষ পৃ.,ক.৭), জনকণ্ঠ (পৃ.১,ক.৮)।

১২। ওডিআইতে তৃতীয়বারের মতো বাংলাওয়াশ জিম্বাবুয়ে

চলতি তিন ম্যাচ ওডিআই সিরিজের প্রথম দুটি ম্যাচ জিতে সিরিজ নিজেদের করে নেওয়া টাইগাররা গতকাল ১১ নভেম্বর বুধবার অনুষ্ঠিত শেষ ওডিআইতে ৬১ রানের জয়ে জিম্বাবুয়েকে আবারও ‘বাংলাওয়াশের’ তেতো স্বাদ দিয়েছে। এ নিয়ে তিনবার ‘বাংলাওয়াশ’ হলো জিম্বাবুয়ে। ২০১৪ সালের নভেম্বর মাসেও ৫-০ ব্যবধানে বাংলাদেশের মাটিতে সিরিজ হেরেছিল জিম্বাবুয়ে। বাংলাদেশের কাছে জিম্বাবুয়ের এটা নবম সিরিজ পরাজয়। আর টাইগারদের জন্য এটা একাদশবারের মতো প্রতিপক্ষকে ‘বাংলাওয়াশ’ করার কৃতিত্ব। সূত্র-সংবাদ, ইণ্ডেফ্যাক, সমকাল, ভোরের কাগজ, যুগান্তর, ডেইলি অবজারভারসহ অধিকাংশ দৈনিক এ বিষয়ে লিড নিউজ ছেপেছে।

সম্পাদকীয়

- ক. প্রথম আলো, ইনকিলাব, সমকাল, সংবাদ, ডেইলি অবজারভার : একটার পর একটা খুনের ঘটনা ও লেখক, প্রকাশক, শিল্পী তথা মুক্তবুদ্ধির মানুষের প্রতি ক্রমাগত হুমকির ঘটনায় জনমনে যে গভীর উদ্বেগ ও নিরাপত্তাহীনতা সৃষ্টি হয়েছে তা দূর করতে অপরাধী চক্রকে ধরে বিচারে সোপর্দ করে জনমনে নিরাপত্তাবোধ ও অভয়ের পরিবেশ ফিরিয়ে আনার ওপর গুরুত্বারোপ;
- খ. ইণ্ডেফ্যাক : ময়মনসিংহের নান্দাইল উপজেলার রসুলপুর-ত্রিমোহনী সেতুর সংযোগ সড়ক নেই প্রায় ৪০ বৎসর ধরে উল্লেখ করে দেশের যে সকল সেতুর সংযোগ সড়ক নির্মাণ বা সংস্কার করা হয়নি জনস্বার্থে তা অবিলম্বে নির্মাণ বা সংস্কার করে ব্যবহার উপযোগী করার সুপারিশ;
- গ. জনকণ্ঠ : তথ্য মন্ত্রণালয় অনলাইন-প্রতিকার প্রকাশকদের পত্রিকা প্রকাশের ক্ষেত্রে সরকারি সুযোগ-সুবিধা নিশ্চিত করতে দেশের সব অনলাইন গণমাধ্যমকে নিবন্ধনের আওতায় আনার সিদ্ধান্ত নিয়েছে উল্লেখ করে গণমাধ্যমের স্বচ্ছতা ও জবাবদিহিতার জন্য তা প্রয়োজন বলে মত প্রকাশ;
- ঘ. ইনকিলাব : বিশ্ব বাণিজ্য সংস্থার সিদ্ধান্ত অনুযায়ী আগামী ১৭ বছর ওষুধ শিল্পে বাংলাদেশের প্যাটেন্ট রাইট আইন মানার বাধ্যবাধকতা থাকছে না এতে করে ওষুধ রপ্তানি করে সর্বোচ্চ বৈদেশিক মুদ্রা অর্জন করা সম্ভব হবে বলে আশা প্রকাশ;
- ঙ. সমকাল, ভোরের কাগজ, যায়যায়দিন, ইন্ডিপেন্ডেন্ট : বাংলাদেশে ১৮ বছর পূর্ণ হওয়ার আগেই ৭৩ শতাংশ মেয়ের বিয়ে হয়ে যায় আন্তর্জাতিক শিশু অধিকার সংস্থা প্ল্যান ইন্টারন্যাশনাল ও যুক্তরাজ্যভিত্তিক গবেষণা প্রতিষ্ঠান কোর্যাম ইন্টারন্যাশনালের যৌথ জরিপ প্রতিবেদনে প্রকাশিত হওয়ায় উদ্বেগ প্রকাশ করে বাল্য বিয়ে রোধে সবাইকে সচেতন হওয়ার আহ্বান;
- চ. ডেইলি স্টার : মেশিন রিডেবল পাসপোর্ট (এমআরপি) নবায়নের সময়সীমা ২৪ নভেম্বর ২০১৫ অতিক্রম করলে মধ্যপ্রাচ্য ও মালয়েশিয়ায় অবস্থানরত ৫ লাখ বাংলাদেশি প্রবাসী কর্মীদের ভাগ্য সে দেশের সরকারের সিদ্ধান্তের ওপর নির্ভরশীল হয়ে পড়বে উল্লেখ করে এ বিষয়ে বাংলাদেশ সরকারকে দ্রুত করণীয় কার্যকর সিদ্ধান্ত নেওয়ার সুপারিশ;

- ছ. **ইন্ডিপেনডেন্ট** : রাজধানীর সড়কগুলোর সংস্কার কাজে নিম্নমানের নির্মাণ সামগ্রী ব্যবহৃত হওয়ায় প্রতি বছর সড়কগুলো ভেঙ্গে নষ্ট হয়ে সরকারি অর্থের অপচয় হওয়ায় এ ধরনের দুর্নীতির কাজে জড়িতদের বিরুদ্ধে যথাযথ আইনি ব্যবস্থা নেওয়ার আহ্বান;
- জ. **ডেইলি সান** : রেলওয়ে এখনও সাধারণ জনগণের মধ্যে জনপ্রিয় যান হওয়ায় সঠিক তত্ত্বাবধান দ্বারা রেলওয়ের হারানো গৌরব ফিরিয়ে আনার ওপর গুরুত্বারোপ;
- ঝ. **নিউজ টুডে** : দুই বিদেশি নাগরিক হত্যা, ধর্মীয় অনুষ্ঠানে বোমা হামলা, কর্তব্যরত দুই পুলিশ হত্যা, প্রকাশক ও ব্লগারদের ওপর হামলা এসব বিভিন্ন ঘটনা যেন আসন্ন ১৫ নভেম্বরে অনুষ্ঠিতব্য ডেভেলপমেন্ট পার্টনারদের সম্মেলনকে প্রভাবিত না করে সে ব্যাপারে কর্তৃপক্ষকে যথোপযুক্ত পদক্ষেপ নেওয়ার আহ্বান জানিয়ে সম্পাদকীয় প্রকাশ করেছে।

উপ-সম্পাদকীয়

প্রথম আলো পত্রিকায় প্রকাশিত কলামে গণতন্ত্র শুধু সংসদ আর রাজনৈতিক দলকে নিয়ে নয় এতে নাগরিক গোষ্ঠীগুলোকেও গুরুত্ব দিতে হবে বলে উল্লেখ করা হয়েছে।

নিবন্ধ ও ফিচার

যুগান্তর পত্রিকায় প্রকাশিত ‘মধ্যবিত্তের বিকাশ উন্নয়নের নির্দেশক’ শিরোনামের নিবন্ধে এম এ খালেক অর্থনৈতিক সম্ভাবনাকে কাজে লাগানোর জন্য যুবশক্তিকে প্রশিক্ষণের মাধ্যমে কর্মোপযোগী করে গড়ে তুলতে হবে বলে অভিমত প্রকাশ করেছেন।

#

ফাহিমা/মরজিনা/সাদ্দা/বিপু/২০১৫/৯.০০ ঘণ্টা